



UJEDINJENE NACIJE

## Međunarodni rezidualni mehanizam za krivične sudove

Međunarodni rezidualni mehanizam za krivične sudove (Mehanizam) osnovao je Savjet bezbjednosti Ujedinjenih nacija 22. decembra 2010. da nastavi nadležnosti, prava, obaveze i ključne funkcije Međunarodnog krivičnog suda za Ruandu (MKSJR) i Međunarodnog krivičnog suda za bivšu Jugoslaviju (MKSJ) nakon okončanja njihovih mandata 2015., odnosno 2017. godine.

### IZJAVA

PREDSJEDNIK

(Isključivo za medije. Nije zvaničan dokument)

Hag, 23. oktobar 2020.

## Sudija Carmel Agius, predsjednik Međunarodni rezidualni mehanizam za krivične sudove Govor povodom otvaranja izložbe u Informativnom centru u Sarajevu: "Prikaz rada i doprinosa MKSJ-a" 23. oktobar 2020.

Ekselencije, dame i gospodo,

Dobro veče svima. Volio bih da mogu biti s vama na licu mjesta. Moje ime je Carmel Agius i predsjednik sam Međunarodnog rezidualnog mehanizma za krivične sudove (Mehanizma), organizacije nasljednice i Međunarodnog krivičnog suda za bivšu Jugoslaviju (MKSJ) i Međunarodnog krivičnog suda za Ruandu (MKSJR).

Kao što neki od vas možda znaju, prije toga sam šesnaest godina bio sudija MKSJ-a i posljednji predsjednik MKSJ-a od novembra 2015. do istorijskog okončanja mandata Međunarodnog suda u decembru 2017. Stoga mi je iskreno zadovoljstvo da vam se obratim povodom otvaranja značajne nove izložbe, "Prikaz rada i doprinosa MKSJ-a", u sarajevskoj Vijećnici.

Iako ovu poruku snimam u prostorijama Mehanizma u Haagu, mogu se jasno prisjetiti veličanstvene zgrade Vijećnice. Njena istorija i zadivljujuća ljepota projiciraju snažnu poruku o duhu ovog grada i otpornosti njegovih ljudi. Nekad velika univerzitetska biblioteka, zgrada Vijećnice bila je granatirana i spaljena do temelja tokom rata, da bi se ponovo podigla iz pepela zahvaljujući upornosti i mukotrpnim naporima građana Sarajeva i mnogih prijatelja.

Naročito sam zahvalan Gradu Sarajevu što je, kao domaćin prvog Informativnog centra o MKSJ-u koji je osnovan, postupio u skladu s duhom rezolucije 1966 Savjeta bezbjednosti Ujedinjenih nacija, koja pominje osnivanje takvih centara. Informativni centar, smješten u zgradi gradske Vijećnice, pruža neuporediv pristup javnoj dokumentaciji iz arhiva MKSJ-a. Na taj način, on ima izuzetno dragocjenu ulogu u promovisanju i očuvanju naslijeđa MKSJ-a. Ovaj značajan projekat ne bi bio moguć bez opredijeljenosti i kontinuirane podrške Grada Sarajeva, kojem se iz sveg srca zahvaljujem.

Izložba koja se danas otvara biće stalna postavka. Ona predstavlja odlučnost Grada Sarajeva i osoblja Informativnog centra da istraže inovativne načine predočavanja rada MKSJ-a svakom ko je zainteresovan da sazna više. S eksponatima koji prikazuju presude MKSJ-a, kao i sudski utvrđene činjenice, izvode iz iskaza svjedoka, te fotografije, ova izložba će pružiti fantastičan uvid u neke od sudskih postupaka MKSJ-a i njegova glavna dostignuća i pokazaće u kojoj mjeri je bio značajan MKSJ, kao prvi međunarodni krivični sud poslije Nirnberga i Tokija.

Pored toga, izložba će ponuditi posjetiocima jedinstvenu mogućnost da steknu saznanja o sukobima iz 1990-ih godina i odaju počast sjećanju na žrtve. Zaista se nadamo da će izložba nadahnuti sve koji se udube u te materijale da razmisle o strahotama rata, univerzalnoj vrijednosti ljudskog života i značaju vladavine prava.



Na kraju, želim istaći ključni značaj očuvanja naslijeđa MKSJ-a u vrijeme kada je Bosna i Hercegovina, zajedno s drugim zemljama bivše Jugoslavije, suočena s ozbiljnim i otvorenim otporima pomirenju s prošlošću. Posebno je zabrinjavajuće to što su otvoreno poricanje zločina, pa čak i slavljenje osuđenih ratnih zločinaca, i dalje jasno prisutni u regionu. Takvi narativi samo produbljuju jaz između zajednica i usporavaju ionako komplikovane procese postkonfliktnog oporavka. Iskreno se nadam da će izložba koju danas otvaramo pomoći u suprostavljanju tim dezinformacijama i poricanju – a znam da tu nadu dijele i organizacije koje podržavaju rad Centra, uključujući Fondaciju Konrad Adenauer, koja velikodušno sponzoriše ovu izložbu.

Da zaključim, pozivam vas sve da ovu novu stalnu izložbu vidite kao priliku za aktivno učenje, razgovor i pamćenje. Dugujemo to nevinim žrtvama oružanih sukoba u bivšoj Jugoslaviji.

Hvala vam.

\*\*\*\*

---

**Za više informacija stupite u kontakt sa Službom za odnose s javnošću**

u Arushi, Tel.: +255 (0)27 256 5376

u Haagu, Tel.: +31 (0)70 512 5691

Email: [mict-press@un.org](mailto:mict-press@un.org)

Pratite nas na [Facebooku](#), [Twitteru](#), [YouTubeu](#), [LinkedInu](#)

[www.irmct.org](http://www.irmct.org)